

食貨典第一百六十一卷

漕運部彙考七

元三

英宗至治元年增置都漕運司疏滌小直沽汭河口以通漕運以海漕至直沽遣使祀海神按元史英宗本紀至治元年春正月壬午增置鄆州都漕運司同知運判各一員五月辛卯海漕糧至直沽遣使祀海神天妃按河渠志元年正月十一日漕司言夏運海糧一百八十九萬餘石轉漕往返全藉河道通便今小直沽汭河口潮汐往來淤泥壅積七十餘處漕運不能行宜移文都水監疏濬工部議時農作方興兼民多艱食若不差軍助役民力有所不逮樞密院言軍人不敷省議若差民丁方今東作之時恐妨歲事其令大都募民夫三千日給傭鈔一兩糙粳米一升委正官提調驗日支給令都水監暨漕司官同督其事四月十一日入役五月十一日工畢

至治三年又以海漕至直沽祀神減海道歲運糧修治練河以通遞運按元史英宗本紀三年二月辛卯海漕糧至直沽遣使祀海神天妃秋七月己酉減海道歲運糧二十萬石按拜住傳三年

六月拜住以海運糧視世祖時頓增數倍今江南民力困極而京倉充滿奏請歲減二十萬石帝遂併鐵木迭兒所增江淮糧免之

按續文獻通考三年江浙行省言鎮江運河全藉練河之水爲上源漕運商販舟楫無不由此以供億前朝嘗濬此湖瀦畜潦水若運河水淺開放練河一寸可添河水一尺近年淤塞以致漚運不通乞加修治制可工畢又置湖兵百人專任修理
按太倉州志三年以江南民困京倉有餘減海道歲運糧二十萬石

泰定帝泰定元年差軍修築霖雨決壞運糧河岸
按元史泰定帝本紀不載
按河渠志泰定元年二月福府臣奏臨清萬戶府言至治元年霖雨決壞運糧河岸宜差軍修築臣等議誠利益事令本府差軍三百執役從之

泰定二年運粟貯瀕河諸倉以備賑海運江南糧至京
按元史泰定帝本紀二年九月戊申朔以郡縣饑詔運粟十五萬石貯瀕河諸倉以備賑救己酉海運江南糧百七十萬石至京師
按續文獻通考二年海運江南糧一百七十萬石直至於京師時廷議海漕事康里回以廩積方饒奏減糧數以舒東南民力可其奏

泰定四年八月庚辰運粟十萬石貯瀕河諸倉備內郡饑 按元史泰定帝本紀云云

致和元年泰定帝崩文宗命海道運米造金符及卽位改元調運糧軍守禦海港放還防河運糧軍
按元史文宗本紀致和元年七月庚午泰定皇帝崩於上都八月丁巳帝至京師入居大內九月戊辰命海道萬戶府來年運米三百一十萬石造金符八十壬申帝卽位於大明殿乙酉調臨清萬戶府運糧軍三千五百守禦益都般陽諸處海港冬十月丁未放還防河運糧軍

文宗天曆二年浚漕運河命運糧至京師仍飭海漕之禁又命分漕米以紓民力 按元史文宗本紀天曆二年夏四月壬辰浚渤海漕運河六月壬子海運糧至京師凡百有四十萬九千一百三十石九月甲戌命江淞行省明年漕運糧二百八十萬石赴京師冬十月辛卯申飭海道轉漕之禁丙申命江西湖廣分漕米四十萬石以紓江淞民力 按續文獻通考二年命江浙行省明年漕運

糧二百八十萬石赴京師王克敬調海道都漕海運萬戶是歲當天曆之變海漕舟有後至直沽者不果輸復漕而南還行省欲坐罪督運者勒其還趨直沽克敬以爲脫在常年而往返若是信可罪今蹈萬死完所漕而還豈得已哉乃請令其計石數附次年所漕舟達京師省臣從之

至順元年以江淞饑乏今歲海運令來歲補運禁權勢私決運糧河隄堰又以江淞稅糧不足明年海運令他省補運 按元史文宗本紀至順元年二月乙未中書省言江淞民饑今歲海運爲米二百萬石其不足者來歲補運從之九月庚辰江淞行省言今歲夏秋霖雨大水沒民田甚多稅糧不滿舊額明年海運本省止可二百萬石餘數令他省補運爲便從之 按河渠志天曆三年

即至順元年係

五月內
改元

三月中書省臣言世祖時開挑通惠河安置閘座全藉上源白浮一畝等泉之水以通漕運

今各枝及諸寺觀權勢私決隄堰澆灌稻田水碾園圃致河淺妨漕事乞禁之奉旨白浮甕山直抵大都運糧河隄堰泉水諸人毋挾勢偷決大司農司都水監可嚴禁之

至順二年令江浙復增明年海運糧二十萬又以江浙等路水災減明年海運米命河南江西補之 按元史文宗本紀二年八月己未中書省臣言明年海運糧二百四十萬石已令江浙運二百二十萬河南二十萬今請令江浙復增二十萬本省叅政杜貞督領從之冬十月丁巳中書省臣言江浙平江湖州等路水傷稼明年海漕米二百六十萬石恐不足若令運百九十萬而命河南發三十萬江西發十萬爲宜從之

至順三年海道漕運糧至京師寧宗卽位令江浙來歲補運不及糧數 按元史文宗本紀三年八月丁未海道漕運糧六十九萬餘石至京師 按寧宗本紀三年十月庚子帝卽位辛亥以江浙歲比不登其海運糧不及數俟來歲補運

順帝元統二年令江浙存海運糧備饑 按元史順帝本紀元統二年五月中書省臣言江浙大饑請存海運糧七十八萬三百七十石以備不虞從之

至元三年冬十月乙亥命江浙行省丞相搠思監提調海運 按元史順帝本紀云云 按姦臣傳搠思監至元三年拜江浙行中書省叅知政事國用所倚海運爲重是歲搠思監被命督其役措置有方漕米三百餘萬石悉達京師無耗折者

至元四年撥江西河南糧補江浙海運數又以江西海運糧賑糶 按元史順帝本紀四年春正月己未江浙海運糧數不足撥江西河南五十萬石補之二月龍興路南昌州饑以江西海運糧賑糶之

至正元年通計江浙河南起運糧數 按元史順帝本紀至正元年冬十月甲寅中書省臣奏海運

不給宜令江浙行省於中政院財賦府撥賜諸人寺觀田糧總運二百六十萬石從之 按食貨志元自世祖用伯顏之言歲漕東南粟由海道以給京師始自至元二十年至於天曆至順由四萬石以上增而爲三百萬以上其所以爲國計者大矣歷歲旣久弊日以生水旱相仍公私俱困疲三省之民力以充歲運之恆數而押運監臨之官與夫司出納之吏恣爲貪黷腳價不以時給收支不得其平船戶貧乏耗損益甚兼以風濤不測盜賊出沒剽劫覆亡之患自仍改至元之後有不可勝言者矣由是歲運之數漸不如舊至正元年益以河南之粟通計江南三省所運止得二百八十萬石至正二年令江浙盡數起運漕糧議開導西山金口等河以通漕運又王思誠疏請簽補打捕戶及阿難荅百姓運糧 按元史順帝本紀不載 按食貨志二年又令江淞行省及中政院財賦總管府撥賜諸人寺觀之糧盡數起運僅得二百六十萬石而已及汝潁倡亂湖廣江右相繼陷沒而方國珍張士誠竊據浙東西之地雖縻以好爵資爲藩屏而貢賦不供剝民以自奉於是海運之舟不至京師者積年矣 按許有壬傳有壬至元六年爲叅知政事明年改元至正轉中書左丞二年囊加慶善八及孛羅帖木兒獻議開西山金口導渾河踰京城達通州以通漕運丞相脫脫主之甚力

有壬曰渾河之水湍悍易決而足以爲害淤淺易塞而不可行舟況地勢高下甚有不同徒勞民費財耳不聽後卒如有壬言 按王思誠傳思誠至正二年拜監察御史上疏言至元十六年開填河設填夫戶八千三百七十有七車戶五千七十出車三百九十兩船戶九百五十出船一百九十艘填夫累歲逃亡十損四五而運糧之數十增八九船止六十八艘戶止七百六十有一車之存者二百六十七兩戶之存者二千七百五十有五晝夜奔馳猶不能給填夫戶之存者一千八百三十有二夫日運四百餘石肩背成瘡顙頰如鬼甚可哀也河南湖廣等處打捕鷹房府打捕戶尙玉等一萬三千二百二十五戶阿難荅百姓劉德元等二千三百戶可以簽補使勞佚相資朝廷是其議至正四年以秦從德提調海運 按元史順帝本紀四年九月辛亥以南臺治書侍御史秦從德爲江浙行省叅知政事提調海運

至正六年宋文瓚乞捕劫賊以通運道不聽 按元史順帝本紀六年三月辛未盜扼李開務之開河劫商旅船兩淮運使宋文瓚言世皇開會通河千有餘里歲運米至京者五百萬石今騎賊不過四十人劫船三百艘而莫能捕恐運道阻塞乞選能臣率壯勇于騎捕之不聽

至正九年漕運使賈魯達建言漕運便益事 按元史順帝本紀九年漕運使賈魯達言便益二十餘事從其八事其一曰京畿和糴二曰優卹漕司舊領漕戶三曰接運委官四曰通州總治預定委官五曰船戶困於填夫海糧壞於填戶六曰疏濬運河七曰臨清運糧萬戶府當隸漕司八曰宜以宣忠船戶付本司節制

至正十二年樊執敬督海運被劫既以海道萬戶李世建言權停之 按元史順帝本紀不載 按忠義傳樊執敬至正十年授江浙行省叅知政事十二年二月督海運於平江十日將發官大宴犒於海口俄有客船自外至驗其券信令入而不虞其爲海寇也既入港卽縱火鼓譟時變起倉猝軍民擾亂賊竟焚舟劫糧以去 按太倉州志十二年五月海道萬戶李世建言權停海運從之 按元史海運數天曆後無考但云漸不如舊至正元年二百八十萬石二年二百六十萬石至是運舟不至京師者積年今考其時抄略多屬方國珍國珍降附授防禦運糧海道萬戶則未知復通否也

又按志十二年方國珍率島寇入時三月十三日浙省叅政樊執敬督海運將發宴犒海口頃之客

艘腐至忽大譟燒舟糧無數十五日抵太倉賴漕戶杭和卿招僧繆懺首應敵殺賊居民得跳逸

至正十五年以海運糧不敷撥鈔糴米貯瀕河倉聽運分置海道防禦運糧萬戶府 按元史順帝

本紀十五年六月庚辰江浙省臣言至正十五年稅課等鈔內除詔書已免稅糧等鈔較之年例海運糧并所支鈔不敷乞減海運以甦民力戶部定擬本年稅糧除免之外其寺觀并撥賜田糧十月開倉盡行拘收其不敷糧撥至元折中統鈔一百五十萬錠於產米處糴一百五十萬石貯瀕河之倉以聽撥運從之秋七月陞台州海道巡防千戶所爲海道防禦運糧萬戶府九月乙酉立分海道防禦運糧萬戶府於平江路

至正十六年以方國珍爲海道漕運萬戶董搏霄建議權令軍人陸運軍糧 按元史順帝本紀十六年三月戊申方國珍復降以爲海道運糧漕運萬戶兼防禦海道運糧萬戶 按董搏霄傳搏霄至正十六年同僉淮南行樞密院事建議海鹽一境不通舟楫軍糧惟可陸運而凡瀕淮海之地人民屢經盜賊宜加存撫權令軍人搬運其陸運之方每人行十步三十六人可行一里三百六十人可行一十里三千六百人可行一百里每人負米四斗以夾布囊盛之用印封識人不息肩米不著

地排列成行日行五百回計路二十八里輕行一十四里重行一十四里日可運米一百石每運給米一升可供二萬人此百里一日運糧之術也

按明外史方國珍傳國珍黃巖人入海聚眾數千人劫運艘梗海道元遣使招之數降數叛不可撫行省以聞於朝國珍使人浮海至京師賂諸權貴卒許降授徽州路治中令散其眾之官國珍不聽命擁船千艘攻陷台州焚蘇之太倉元復以海道漕運萬戶招之乃受官

至正十八年造大車挽運糧儲 按元史順帝本紀十八年二月癸酉造大車百輛以挽運糧儲官民田十止收二分冬則陸運夏則水運

至正十九年徵海運糧於江淞 按元史順帝本紀十九年九月明兵取衢州路詔遣兵部尚書伯顏帖木兒戶部尚書曹履亨以御酒龍衣賜張士誠徵海運糧 按食貨志十九年朝廷遣兵部尚

書伯顏帖木兒戶部尚書齊履亨徵海運於江淞由海道至慶元抵杭州時達識帖睦爾爲江淞行中書省丞相張士誠爲太尉方國珍爲平章政事詔命士誠輸粟國珍具舟達識帖睦爾總督之既達朝廷之命而方張互相猜疑士誠慮方氏載其粟而不以輸於京也國珍恐張氏掣其舟而因乘

虛以襲己也伯顏帖木兒白於丞相正辭以責之異言以諭之乃釋二家之疑克濟其事先率海舟俟於嘉興之澈浦而平江之粟展轉以達杭之石墩又一舍而後抵澈浦乃載於舟海灘淺澀躬履艱苦粟之載於舟者爲石十有一萬二十年五月赴京是年秋又遣戶部尙書王宗禮等至江浙按達識帖睦爾傳達識帖睦爾至正十五年爲江浙行省左丞相尋兼知行樞密院事許以便宜行事時江淮盜勢日盛南北阻隔達識帖睦爾獨治方面明年朝廷以招安張士誠爲達識帖睦爾功詔加太尉十九年朝廷因授士信江浙行省平章政事士信乃大發浙西諸郡民築杭城先是海漕久不通朝廷遣使來徵糧士誠運米十餘萬石達京師方面之權悉歸張氏達識帖睦爾徒存虛名而已按察罕帖木兒傳察罕帖木兒以功拜河南行省平章政事兼知河南行樞密院事陝西行臺御史中丞仍便宜行事詔告天下先是中原亂江南海漕不復通京師屢苦饑至是河南既定檄書達江浙海漕乃復至按太倉州志十九年遣使以御酒龍衣賜張士誠求糧士誠因方國珍舟輸粟十一萬石於次年五月赴京

至正二十年張士誠海運糧至京師又貢師泰以閩糧由海道轉運給京師按元史順帝本紀二

十年五月張士誠海運糧十一萬石至京師

按續文獻通考二十年貢師泰以戶部尚書分部

閩中以閩鹽易糧由海道轉運給京師凡爲糧數十萬石金陵之屬州溧陽田賦八萬石入海漕者七萬四千石有奇歲轉輸龍灣廣運倉由宜興無錫崑山嘉定四州之境出海入江至於丹徒歷金山及黃天蕩泝流而上風濤湍激累月然後能達其程二千五百餘里或遭覆溺寇攘之患則爲費倍蓰至正三年行臺監察御史建議于臺以爲溧陽與宜興接壤舟楫之利瞬息可至曷若聽民築倉于宜興歲輸其租以給海漕則官富足而民力紓誠大益也或者憚于更張遷玩累年至至正丁亥御史大夫納麟蒞政南臺卒定其事民大欣慰 按明外史張士誠傳士誠降於元授太尉官雖去僞號擅甲兵土地如故順帝遣使徵糧賜之龍衣御酒士誠自海道輸糧十一萬石於大都歲以爲常

至正二十一年張士誠海運糧至京師既又命徹徹不花等往徵之 按元史順帝本紀二十一年

三月張士誠海運糧一十一萬石至京師九月命兵部尚書徹徹不花侍郎韓祺徵海運糧於張士

誠 按食貨志二十一年五月運糧赴京如上年之數九月又遣兵部尚書徹徹不花侍郎韓祺往

徵海運糧一百萬石

至正二十二年張士誠海運糧赴京視上年之數加二萬 按元史順帝本紀二十二年五月張士誠海運糧一十三萬石至京師 按食貨志二十二年五月運糧赴京視上年之數僅加二萬而已九月遣戶部尙書脫脫歡察爾兵部尙書帖木至江浙

至正二十三年張士誠仍運糧十三萬石赴京 按元史順帝本紀二十三年五月己巳朔張士誠海運糧十三萬石至京師 按食貨志二十三年五月仍運糧十有三萬石赴京九月又遣戶部侍郎博羅帖木兒監丞賽因不花往徵海運士誠託辭以拒命由是東南之粟給京師者遂止於是歲云 按太倉州志二十三年五月運糧十三萬石赴京是年士誠稱吳王改元天祐徵糧不應元海運遂止 按元史食貨志元都燕去江南極遠而食貨一切仰給自伯顏建海議分江南糧爲春夏二運於是歲抵京師者多至三百餘萬石

明一

明代漕運立海運河運二道凡各處起運數目督運官員運糧旗軍及運漕倉數運船料額俱詳備

焉 按明會典戶部漕運督運官員各年添革不一今書見存者於前而附各事例於後

總督都御史一員總兵官一員

把總舊有遮洋總一員萬曆元年革 南京二員中都留守司一員浙江二員江西一員湖廣一員
山東一員江北直隸二員江南直隸二員

監兌戶部主事五員每歲於漕運議事畢選差請勅分詣山東河南南直隸浙江江西湖廣督軍民
有司依期交兌催儼起程南運督至儀真與儼運官交接明白卽將各兌完起程并交接日期報部
查考回日仍將兌完日期具奏

儼運御史一員舊用戶部郎中一員三月奏差今改差御史

押運叅政一員舊有協同漕運叅將二員今革以一叅政領漕務

理刑刑部主事一員或員外郎三歲代萬曆二年革十一年復差

運糧官軍南京把總二各領衛十三錦衣衛廣洋衛江陰衛龍虎衛鎮南衛神策衛府軍衛府軍右
衛豹韜左衛龍江右衛金吾後衛衛虎賁左衛留守左衛以上把總一員領旗手衛府軍左衛金吾前

衛府軍後衛興武衛藩陽右衛應天衛橫海衛水軍左衛水軍右衛龍虎左衛龍江左衛羽林左衛
以上把總一員領 江南直隸把總二領衛所十九建陽衛新安衛安慶衛九江衛宣州衛鷹揚

衛豹韜衛武德衛留守右衛虎賁右衛以上上江把總領鎮江衛太倉衛蘇州平鎮海衛留守中衛
驍騎右衛羽林右衛嘉興守禦千戶所松江守禦千戶所以上下江把總領 江北直隸把總二

領衛所十五淮安衛大河衛泗州衛邳州衛壽州衛以上把總一員領揚州衛高郵衛儀真衛廬州
衛六安衛滁州衛通州守禦千戶所泰州守禦千戶所鹽城守禦千戶所興化守禦千戶所以上把
總一員領 中都把總一領衛所十一留守左衛留守中衛鳳陽衛鳳陽右衛鳳陽中衛懷遠衛

長淮衛宿州衛武平衛潁川衛洪塘湖屯田千戶所 浙江把總二領衛所十三杭州前衛杭州

右衛紹興衛海寧衛海鹽守禦千戶所湖州守禦千戶所嚴州守禦千戶所以上浙西把總領寧波
衛台州衛温州衛處州衛衢州守禦千戶所金華守禦千戶所以上浙東把總領 山東把總一

領衛所十九臨清衛平山衛東昌衛濟寧衛兗州護衛東衛守禦千戶所濮州守禦千戶所以上係
本總原領徐州衛徐州左衛歸德衛德州衛德州左衛天津衛天津左衛天津右衛通州左衛通州

右衛定邊衛神武中衛以上係裁革遮洋併入本總數

湖廣把總一領衛所十舊有荊州左衛

嘉靖間改顯陵衛舊有安陸衛改承天衛俱免運武昌衛武昌左衛蘄州衛黃州衛荊州衛荊州右衛岳州衛襄陽衛沔陽衛德安守禦千戶所

江西把總一領衛所十一南昌衛袁州衛贛州衛

吉安守禦千戶所安福守禦千戶所永新守禦千戶所撫州守禦千戶所建昌守禦千戶所鉛山守禦千戶所廣信守禦千戶所饒州守禦千戶所

又按會典南京戶部各處起運數目浙江布政司南京各衛倉原額秋糧米三十萬石今二十五萬七千四百九石南京供用庫原額白熟粳米四千石今三千五百石准糙粳米三千八百五十石南京丙字庫夏稅串五絲二萬兩荒絲二萬兩中白綿三千兩南京承運庫農桑絹三千五百疋五尺九寸三分八釐八絲二忽五微今三千五百九疋一丈一尺七寸七分零南京定場馬草原額一十九萬包今一十九萬二千六百五十包

江西布政司南京各衛倉原額米四十七萬石今三十

六萬九千四百三十六石七斗一升九勺南京庫關白棉布一十萬疋准米一十萬石關白苧布七萬疋准米四萬九千石苧布一千三百四十一疋二尺四寸後每疋折銀二錢南京原額戶口鈔四